

- begnage it wol, it is wol vet.
 dat morsêl, dat he em do langede,
 was dat krumholt, dâr dat swyn by hangede.
 Reinke konde nicht spreken van smachte.
 220 merket, gy heren, wat he do dachte.
 ik segget ju, her konnink, gnêdige here,
 der gelyk syn wol hundert stücke este mere,
 de Ysegrim by Reinken heft gedân,
 dat grôts^{te} late ik noch achter stân.
 225 kumt Reinke to hove mank desse gesellen,
 he wert it sulven wol bet vortellen.
 merket, here her konnink, eddele vorste,
 wan ik it jummer seggen dorste,
 so sprikt Ysegrim ên geklik wôrt,
 230 dat gy heren wol hebben gehôrt:
 he sprikt sulven up syn egene wyf,
 de he scholde bedecken mit sele unde lyf,
 unde also beschûten *stedes ere ere*.
 it is wol seven jâr este mere,
 235 dat Reinke ergaf ên dêl syner truwen
 vrouwen Gyremôt, der schonen vrouwen.
 dat schach in eneme aventdans,
 wente Ysegrim was do buten lants,
 ik segge it so also ik it weit,
 240 it geschach in vruntliker hovescheit
 vaken Reinkens wille — mêr segge ik nicht.
 wattan? se klaget jo sulven nicht,
 se was des to hant schêr genesen:
 wat wôrde scholen dâr mêr af wesen?
 245 were Ysegrim vrôt, he swege dârvan,
 dit sulve eme doch klene ere bringen kan.
 Grimbârt sprak vôrt: nu klaget de hase
 ên mēreken unde ene vysevase.
 eft he syne lectie nicht wol en las,
 250 Reinke de syn mester was,
 moste he synen scholer nicht slân?
 dat were unrecht unde ovel gedân!
 scholde men de schôlrekens nicht kastyen
 unde wennen se van eren tûscheryen,
 255 nummERM lereden se to dēgen.
 Nu klaget ôk Wackerlôs, he hadde gekregen
 in eneme winter ene worst,
 de he vorlôs up ener horst.
 de klage were bēter bleven vorholen,
 260 ja, hore gy dat wol, se was gestolen.
 male quēsite, male perdite!
 mit rechte wert men quâtliken quyte,
 dat men ovel heft gewonnen.
 we wil Reinken des vorgunnen,
 265 dat he gestolen dink eme nam?